

Na osnovu članka 16. stavka 3. Zakona o Vladi Zeničko-dobojskog kantona („Službene novine Zeničko-dobojskog kantona“, broj 7/10) , članka 10. stavak 1. i članka 11. Stavak 3 Uredbe o mjerilima, postupku i načinu ocjenjivanja rada rukovoditelja organa državne službe koje postavlja Vlada Zeničko-dobojskog kantona („Službene novine Zeničko-dobojskog kantona“, broj: 4/13), na prijedlog Povjerenstva za predlaganje ocjene rada rukovoditelja organa državne službe i drugih rukovodećih državnih službenika koje postavlja Vlada Zeničko-dobojskog kantona, imenovanog Rješenjem, broj: 02-34-14061/13 od 25.6.2013. godine i broj: 02-34-15266/13 od 10.7.2013. godine, Vlada Zeničko-dobojskog kantona na 130. sjednici održanoj dana 25.10.2013. godine,  
d o n o s i

## **RJEŠENJE**

Rukovoditelj Kantonalne uprava za inspekcijske poslove **Mirsada Silajdžić** postavljena na radno mjesto direktora Kantonalne uprava za inspekcijske poslove, za rad i postignute rezultate u radu u periodu od 01.01.2012 - 31.12.2012. godine, **ocjenjuje se ocjenom „zadovoljava“**.

## **Obrazloženje**

Mirsada Silajdžić, postavljena na radno mjesto rukovoditelja Kantonalne uprava za inspekcijske poslove, ocijenjena je prema proceduri provedenoj u skladu sa Uredbom o mjerilima, postupku i načinu ocjenjivanja rada rukovoditelja organa državne službe koje postavlja Vlada Zeničko-dobojskog kantona („Službene novine Zeničko-dobojskog kantona“, broj 4/13), - u daljem tekstu Uredba.

U skladu sa Uredbom Interresorna radna skupina provela je postupak provjere učinka, zatražila od rukovoditelja organa državne službe da dostavi sve potrebne informacije i dokumente radi izrade izvješća, te na osnovu Izvještaja o radu od 11.07.2013.godine, sačinila pismeno izvješće u kome je konstatovano da je prema svim kriterijima Mirsada Silajdžić ostvarila ukupno 86,25% poslova i radnih zadataka.

Naime, imenovana je kao rukovodilac Kantonalne uprava za inspekcijske poslove izvršavala postavljene ciljeve i zadatke, ali u postupku ocjenjivanja utvrđeno je da Izvještaj o radu Uprave za 2012. godinu nije prihvaćen od strane nadležnih organa, odnosno od Vlade Kantona.

Na predloženu ocjenu učinka imenovana je dala svoje očitovanje od 29.07.2013.godine, u kojem je navela da se Interresorna radna grupa nije u dovoljnoj mjeri uključila u procjene rada ovog organa, te predložila da se izvrši korekcija istih.

Radno tijelo Vlade Kantona razmatralo je izvješće Interresorne radne skupine, očitovanje na isti, obavilo razgovor sa imenovanom, te u skladu sa Uredbom predložilo da se ista ocjeni sa ocjenom „uspješna“.

Prilikom razmatranja prijedloga ocjene na samoj sjednici Vlade, članovi Vlade smatrali su da Interresorna radna grupa nije raspolagala sa svim relevantnim činjenicama, te da nisu pravilno utvrđeni procenti izvršenja poslova i zadataka, odnosno ukupna procjena radnog učinka.

Naime, tijekom 2012. godine organizacija rada direktorice Kantonalne uprave za inspekcijske poslove nije polučila efikasnim obavljanjem poslova, odnosno uspješnim rukovođenjem organom uprave, što je rezultiralo neusvajanjem godišnjeg izvještaja o radu Uprave (za 2012. godinu) od strane Vlade Zeničko-dobojskog kantona i Skupštine Zeničko-dobojskog kantona. Ključne primjedbe iznesene u raspravama po predmetnim izvještajima su se odnosile na

broj inspekcijskih pregleda kojih je u 2012. godini (11.069) u odnosu na 2011. godinu (14.515) bilo samo 76%, iako se već tada implementirao projekat „ E-inspektor“ koji je trebao rezultirati efikasnijim radom inspektora. Nasuprot tome broj dnevnih pregleda po inspektorima je tokom 2012. godine iznosio svega 0,83. Uprkos činjenici da se vrijeme potrebno za inspekcijske preglede ne može generalizirati, te da svaka inspekcija ima određene specifičnosti, broj ostvarenih pregleda je nedopustivo mali, posebno ako se ima u vidu da u Srednjobosanskom kantonu taj broj iznosi četiri pregleda dnevno, u Tuzlanskom kantonu isto toliko, a u vrijeme planiranih akcija taj broj ide i do šest pregleda dnevno.

S tim u vezi, Vlada je stala da realiziranje zaključaka i drugih akata Vlade, koje je bio dužan izvršiti organ državne službe u periodu ocjenjivanja, s posebnim naglaskom na kvantitet, kvalitet, efikasnost i pravodobnost izvršenja postavljenih zadataka ni u kom slučaju ne može iznositi 85% kako je to utvrdila interresorna radna grupa, te da isti može maksimalno iznositi 50%, a ukupan procenat realizacije rada zadržavajući ostale ponuđene parametre iako su isti takođe upitni, iznosi 78%, što prema Uredbi odgovara ocjeni „zadovoljava“.

Prema članku 11. Stavak 3. Uredbe ocjena radnog učinka rukovoditelja organa državne službe utvrđena sukladno stavku 2 ovog članka (u konkretnom slučaju „uspješan“), može se izmijeniti ukoliko se ukupan procenat realiziranja iz članka 8 stavka 3 Uredbe izmijeni na osnovu uvažavanja činjenica koje se odnose na rad organa državne službe navedenih u očitovanju rukovodećeg državnog službenika ili takvih činjenica s kojima raspolaže Vlada Kantona.

Sukladno naprijed navedenom odlučeno je kao u dispozitivu rješenja.

**Pouka o pravnom lijeku:**

Protiv ovog rješenja može se izjaviti prigovor Vladi Zeničko-dobojskog kantona u roku od 8 dana od dana prijema rješenja.

Prigovor se podnosi putem Ministarstva za pravosuđe i upravu u Vladi Zeničko-dobojskog kantona.

Broj: 02-\_\_\_\_\_ /13

Datum, 25.10.2013. godine

Z e n i c a

**PREMIJER**

*Munib Husejnagić, dipl.ing.maš.*

DOSTAVLJENO:

1x Imenovana,

1x Personalni dosije,

1x a/a.